

Pita Ya Iginuma V'-inuana

Buki Taina Wayahina

Buki taina a tau ginuma vivane Pita, Iesu a tau hae ananina aitam, ka Aniduru vaneina. Pita kadu aitam buki ginumi *Awaeha Vovouna* taina nihenina.

Ka leta taina nihenina Pita ya nuanua tau ekalesia viwavenena vitupu ivihahaiei. Ka tau nau-wawani yai vitumahana naona inua-vi-avini, ka eha ivo-haini vitupu wayahi.

Pai mini ananina leta taina nihenina vivane tau ekalesia-naia Iesu vaneana inononi, ka vaneana omo wayahia Iesu a tau hae anani wayahia, ka Pita tau hae ananina aitam. Wayahina, Pita ana-manai ya iginuma taina vivane tunutunuhina.

Ka tuta tepakaia wayahina Iesu na-mavi-havine. Mani tomotau viwavenena taina ivihahaiei, kate itoka tau ekalesia nau-wawanika kavitumahanei a itoava auyewana kavaniahei wayahina.

Nau-kaiwa

¹ Yauke au wava Simoni Pita, Iesu Tau Ito-yavuha ya tau paisewa aitam, kadu a tau hae ananina aitam. Ka yami leta taina aginumi omomo wayahimia. Yaka Yaubada kadu yaka Tau Ito-yavuha Iesu yai dewa tunutunuhina. Ka yai dewaia wayahina, itomi avaha vitumahana

ahihi-vainena uvaniahei, ka yami vitumahana ka yau vitumahana aitamoata.

Nau-iaiava

² Ka yau viama wayahimi vivane Yaubada kadu yaka Kauvea Iesu un'-anamanei ahiahina, e am-venena awawaehina kadu nua gomagomanina uvaniahei deina. Ka kadu yau viama, dewaia na-nata yawaimi nihenina.

Pai Vi-putu

³ Aviani nau-wawanika yawaika wayahina kadu dewa ahihinata wayahina, Yaubada avaha dewaia habuhabuna veneka. Ka dewaia kavaniahei, iuna tauna kanamanei. Tauna didigana kadu dewa hadahadanina wayahina honeka kan'-omo tauna wayahina.

⁴ Ka didigana wayahina kadu yana dewa hadahadanina wayahina, tauna ya vona-dabadaba ani-vainena kadu ahihinata veneka. Ka aituhu aviyaivia wayahikaia ya vona-dabadabaia kavitumahanei, akanai itoka aka pata tauna wayahina didigaka kavaniahei. Ka tuta tuta tau ma' tanopi yai nuanua goyogoyona, ka apaina yawai ivi-goyoi dewaia wayahia. Kate aituhu aviyaivia wayahikaia Yaubada ya vona-dabadabaia kavitumahanei ahiahina, tauka aka pata goyo-naia kanovo-tawanei.

⁵ Aituhu yaka vitumahana ana heta maei, dewana eha ana pata. Wayahina, taumi nau-wawanimi udewa-bagibagi, e mani dewa

yami vitumahana nui unau-tamoia yawaimi ni-henina. Naona, nau-wawanimi dewa hada-hadanina uvaniahei, v^l-inuana nua-uya uvaniahei.

⁶ V^l-itonuna nau-wawanimi ami heta ami pata yawaimi uveimeyei, vi-nau-punina ugwagwa-heyemi, vi-5-na nau-wawanimi yami dewa ka Yaubada yana dewa aitamoata deina.✧

⁷ Vi-6-na nau-wawanimi udune-nuanuaiemi, ka pai nau-yehata wayahina, udewa-vidovidohe mi.

⁸ Aituhu dewaia ahiahina wayahimia, kadu aituhu inatanata ahiahina yawaimi nihenina, e yaka Kauvea Iesu Tau Ito-yavuha un^l-anamanei ahiahina, kadu dewaia ina-vaitemi ya nuanua wayahimi uvi-ateteyei tunutunuhina.

⁹ Kate aituhu aviyaivia dewaia ahiahina iviha-haiei, tau eha ai pata idunedune tunuhina, kadu tau mata-goyogoyoi. Iesu avaha yai dewa goyona tutuaina nua-piahi-yehai, kate nuai ipani.

¹⁰ Wayahina, yaiau, nau-wawanimi yami nuanua ananina nui udewa-dadani hone-nana uvi-munie i, kadu yami nuanua ananina nui udewa-dadani Yaubada ya vi-nua-dadana wayahimi uvaniahei. Nonova yami nuanua uvaniahei deina. Ka nau-wawanimi yami nuanua ataina yami nuanua nonova na-vane-tawanei. Ka aituhu dewaia tanoi habuhabui udewa-nubunubui, eha ami pata Yaubada ya nuanua wayahimi ututu-haini.

¹¹ Ka kadu munia, yaka Kauvea Iesu Tau Ito-yavuha ya dewa-haiawa nui

✧ 1:6: Gal 5:22-23.

na-nau-kaiwemi, ka ya pai veimea una-nui, ka tenoke uma'-vavaha.

¹² Wayahina, yauke yau paisewa ananina ana-ivaitemi yau vona taina unua-vi-avini. Ka anamanei, nonova tupwami dewa taina unononi, kadu avi vona tunutunuhina, avaha vonaia uanamanei, kadu ataina udewa-nubunubui ahiahina.

¹³ Ka tuta ataina, yawayawaiu amamaei. Wayahina, nau-wawaniu avonemi ubagibagi, e dewa ahiahina taina unuanuani. Ika, ininiu aitam ine deina, ka tuta kutakutana wayahina ine taina nihenina amamaei.

¹⁴ Avaha anamanei, tuta eha ani-hoina na-iakwa wayahina yawaiu na-iakwa. Iuna nonova yaka Kauvea Iesu Tau Ito-yavuha vo-vi-maheteu medeina yau aniga na-omo.✧

¹⁵ Wayahina, tuta ataina abagibagi kadu adewa-dadani, e tuta tepakaia, yau aniga munia, viwavenenaia wayahimia ima'-vavaha, e itomi ami pata unua-vi-avini.

Pita Tau Ito-yavuha Didigana Dueyei Matana

¹⁶ Nonova yaka Kauvea Iesu Tau Ito-yavuha ya bagibagi kadu yana omana ahaeyei wayahimia, ka yama hae-nana eha tau vitupu yai vivi-wava deina. Tau vitupu yai viviwava ipaisewei, e ai nonona vivane viviwava tunutunuhina deina. Kate nonova itoai mataia Iesu didigana adudueyei.✧

¹⁷⁻¹⁸ Ka nonova, tutana oya ahihinata hetana tauna nui amamaei, vona ahiahina, Yaubada movina wahuma vin'-omo, ka Iesu didigana

✧ **1:14:** 2Ko 5:1; Ioni 21:18-19. ✧ **1:16:** Mat 17:1-5.

vaniahei, kadu Yaubada Iesu apa-vidovidohei, ka itoai anononi, ivona, “Taina natu ahiahina adewa-vidovidohei, ka tauna wayahina adewa-haiawa ananina.” Ka movina vin'-omo Yaubada Amaka wayahina, ka tauna Didigana Ani-vainena wahuma mamaei.✧

19 Ka nonova tau apa-taputapu Tau Ito-yavuha imai-haeyei, ka tauna wayahina iginumi. Ka ataina avaha aviani imai-haeyei kadueyei, vonaia vona tunutunuhina ana noe. Wayahina, nau-wawanimi yai vonaia unua-vi-anai. Iuna vonaia odama papani novanovanina nihenina mahemaheta a itoava mana na-navia wayahina deina, ka kadu a itoava ubwana nuami nihenina vanevane wayahina deina.

20 Vona taina vona ananina, ka mani vona vane-tawanei, wayahina nau-wawanimi nuami n'-am-hau. Tuta nonova wayahina, tutana tau apa-taputapu iapa-taputapuei, yai vona omomo Yaubada wayahina. Apa-taputapu-naia eha ita-vin'-omo iuna naona tau apa-taputapu-naia Iginuma iaiaia, e ai heta yai nua-uya wayahina anamana ivaniahe, e munia yai nuanua ina-ginumi. Eha-ohota. Tai ai heta eha ai pata.

21 Kadu tutana tau apa-taputapu-naia iapa-taputapu, apa-taputapu-naia eha ita-vin'-omo iuna tau yai nuanua in'-apa-taputapu deina. Eha ohota. Kate apa-taputapu-naia aitamoata aitamoata Yaubada wayahina ivin'-omo, ka Nuana Ahihinata tau apa-taputapu-naia ivaitei, ka

✧ 1:17-18: Mat 17:5.

yai iginuma habuhabui eta-naonaoei.✧

2

Tau Viwavenena Vitupu

¹ Nonova kadu tau apa-taputapu vitupu tupwai imamaei, ka tuta tepakaia wayahina tau viwavenena vitupu tupwai itomi nui umamaei, ka ivivitupu wayahimia. Ka aituhu aviyaivia wayahimia tau vitupu-naia yai viwavenena hivahivai kadu vitupui ina-nononi, munia yawai na-goyo. Ka apaina dewa-yaiyai Yaubada wayahina ivaniahei. Tau viwavenenaia avaha ianamanei, yaka Kauvea tau i goyona a papani wayahina vi-maiei, kate dewana eha aitam aviani wayahia. Wayahina, Iesu ivi-ebuei. Ai vita-vovona vo-kwayavonina na-omo wayahia ivaniahei.✧

² Tuta tepakaia wayahina tau ekalesia habuhabui tau viwavenenaia vitupu yai kenene idudueyei, e pai dune-nana goyona iv'-iunei. Ka munia, mani tomotau, tau i eha itapanono, avaha tau ekalesia-naia yai dewaia goyona idudueyei, Iesu ya etawana tunutunuhina imana-giboei ananina.

³ Ka tau viwavenenaia vitupu gugua inua-tania. Wayahina, tuta tepakaia wayahina tau i viviwava vitupu wayahia yami gugua ivituei. Nonova Yaubada ai nau-pata yai dewa goyona wayahina vo-vi-aiaia, ka ataina tauna potapota, e apaina na-vene i ivaniahei. Yaubada Nuana eha ta-panipani.

✧ **1:21:** 2Ti 3:16; 1Pi 1:11-12. ✧ **2:1:** Mat 24:11; Iud 4.

⁴ Unononi! Nonova anelose tupwai dewa goyona idedewei, ka Yaubada yai dewa goyona eha ta-nua-pania, ka dewaia eha ta-nua-piaha. Kate tauna anelose-naia haponei iopu guba no-vanovanina nihenia, ka ataina tenoke imamaei, ka vitana matana an' auyewa a vin'-omana wayahina ipotapota.✧

⁵ Ka kadu nonova tau ma' tanopi habuhabui dewa goyona idewa-nubunubui. Ka Yaubada tomotau eha ta-ito-yavuha, kate Noa kadu tomotau ai yau 7 nui ito-yavuhi. Iuna Noa dewa tunuhina a tau nau-wahe aitam. Ka Yaubada tau goyogoyo-naia diwaya wayahina vita-vovoni igavivina, tau kadu yai tanopi habuhabuna nui.✧

⁶ Ka kadu nonova Yaubada meagai Sodom ka meagai Gomora vita-vovoni, apuni ivi-hanavu. Ka tauna aitam pai dune veneka deina, e kan'-anamanei apaina, aituhu aviyaivia Yaubada ivihahaiei, tau ai dewa-yaiyai aitamoata ivania-hei deina.✧

⁷ Kadu tuta-nana wayahina, meagai-naia wayahia onoto ana wava Lota yana dewa tunutunuhina. Wayahina, tauna nua-vita ananina tau vihaihai-naia yai kenene wayahia. Ka munia Yaubada Lota ito-yavuhi.✧

⁸ (Vona ahiahina, Lota tau goyogoyo-naia nui imamaei, ka auyewa aitamoata aitamoata nihenina yai kenene dudueyei, kadu yai ipupu-kavokavovo nonononi. Tuta tuta veimea itana-bwegebwegei. Wayahina, tauna nua-vita

✧ 2:4: Iud 6. ✧ 2:5: Nao 6-8; 2Pi 3:6. ✧ 2:6: Nao 19:24; Iud 7.

✧ 2:7: Nao 19:1-16.

ananina, iuna tauna ya nuanua vivane dewa tunutunuhina.)

⁹ Aituhu tuta nonova Kauvea yana dewa deinake, kadueyei tauna avaha anamanei medeina tau ahiahina pai vito-nubu wayahia na-ito-yavuhi, kadu avaha anamanei medeina tau goyogoyoi ai dewa-yaiyai na-venevenei a itoava vitana matana an' auyewa na-omo wayahina.

¹⁰ Vona ahiahina, aituhu aviyaivia Yaubada ya veimea ivihahaiei, ka aituhu yai nuanua gawagawami ivi-munie, apaina dewaia yawai ina-goyoi. Ka aituhu aviyaivia veimea inau-nikonikoiei, kanamanei ahiahina, apaina tau ai dewa-yaiyai ivaniahei Yaubada wayahina. Tomotau tau yai nuanua ana heta idedewei, kate eha ina-ini-yauyau dewaia goyogoyoi wayahi. Kadu tomotau anelose goyogoyoi didigai ani-vainena iapa-goyogoyo-neiei, kate eha imatamatauta yai dewana wayahina.✧

¹¹ Udueyei, ka dewa ainua kabou-viwavei. Yaubada yan' anelose ahiahi yai bagibagi ani-vainena, kadu tau yai pai ma' wahuma. Anelose-naia tomotau ibagibagi-tawanei. Kate tau yai matauta mamaei. Wayahina, ianamane-yehai eha nau-wawani mani anelose goyogoyoi (tau nonova didigai ananina mamaei) iapa-goyogoyoe Kauvea matana.✧

¹² Kate tau viwavenenaia vitupu vahitau udaudana deina, iuna nuai eha t'-am-hau dewaia tanoi wayahina, ka eha yai matauta, kadu eha yai nua-opu Yaubada matana. Tau ai nau-dadana

✧ 2:10: Iud 7-8, 16. ✧ 2:11: Iud 9.

ana heta ivi-munie. Wayahina, tau vahitau mwagemwagei deina. Memeanina tomotau vahitau-naia ivi-daei, ivunui. Ka tau viwavenenaia eha Yaubada yana dewa it'-anamane ahiahina, kate dewaia iapa-goyogoyoei. Wayahina, tau vahitau mwagemwagei deina, ka apaina tau ai vita-vovoni ivaniahei.✧

¹³ Apaina tau ai nau-pata yai dewa goyona wayahi ivaniahei, vivane dewa-yaiyai ananina Yaubada wayahina. Tuta ataina ikenekenene babau ana tuta wayahina, kadu idewa-haiawa-kavokavovo dewaia wayahi. Tau yai dewa vivane gidani kadu bedi ami kwama kavukavuna wayahina deina. Tomotau nui uamam, kate dewana eha nau-wawanimi.

¹⁴ Tuta tuta idune-nau-nene koiaka ivaniahei nui ikenekenene. E ikenene-havihavine, eha magari ibiga. Ka aituhu aviyaivia iva-hamwahamwana, tau viwavene-naia ieta-naoei etawana goyona wayahina ineine. Ka gugua a nua-tania ianamane-yehai. Tau mwata deina, ka Yaubada avaha dewaia habuhabui bwanatai. Wayahina, ai dewa-yaiyai potapotai.

¹⁵ Avaha etawana tunuhina ivihahaiei, ini-tawanei, ka ataina ini-tupatupa. Nonova dewa goyona Beora natuna ana wava Balaam nuana epei, iuna tauna ya nuanua ananina kaikaiwabo na-vaniahei a nau-pata ya paisewa goyona wayahina.✧

¹⁶ Kate Yaubada Balaam ya dewana goyona si-vi-tunuhi vahitau aseV movina wayahina. Yaubada ase-nanaV kumakumana ponaitu venei,

✧ 2:12: Iud 10. ✧ 2:15: Yau 22:7; Iud 11; SiV 2:14.

tomotau ai ponaitu deina, ka ase-nanaV Balaam yana dewa mwagemwagena mana-giboei, ka vito-potei. Ka ataina tau viwavene-naia yai dewa nua-tania ka Balaam yana dewa nua-tania aitamoata deina.✧

¹⁷ Ka tau viwavene-naia vitupui tovoha deina, kate eha daudauna. Ka tau kadue you deina, ka yahina bagibagina iveivei, ka eha ima'-genuana. Wayahina, Yaubada avaha ivi novanovanata vo-vi-aiaia tau wayahi, ka apaina ivaniahei, ima'-vavaha.✧

¹⁸ Iuna tau viwavene-naia ivona-vanevane, kate yai vona awakabina. Ka vonaia wayahina ononotoi tupwai iana-dibidibiei. Ononotoi tau nua-vinana vovou, ka tuta eha ani-hoina iakwa wayahina tau avaha yaiai goyogoyoi ini-tawanei, ka tuta eha ani-hoina iakwa wayahina dewa-yaiyaina inovotawane. Kate tau viwavene-naia vitupui iaipupupu kenene a dewa-haiawa wayahina, e ivi-dae-havinei deina.

¹⁹ Ka tau viwavene-naia ai tau vi-muni iana-dibidibiei, ivonavona, “Etawana taina aviawenemi etawana ahiahina. Iuna avi kenene yami nuanua udedewei akanai, dewaia habuhabui awawaehina wayahimi. Iuna eha aitam veimea mamae na-vito-potami.” Tau viwavene-naia ipupupu deinake, kate tau avaha ivi-tau paisewa-kavokavovo dewa mavununa wayahina. Iuna vona tana-minikuna mamaei, ivona,

“Aviani bagibagi-tawanem,

✧ **2:16:** Yau 22:28-35. ✧ **2:17:** Iud 12-13.

dewana yawaim na-veimeyei,
ka evi-tau paisewa-kavokavovo
wayahina.”

²⁰ Nonova tau i yaka Kauvea kadu yaka Tau Ito-yavuha Iesu vaneana ivitumahanei, e dewa goyona tanopia mavununa ini-tawanei. Kate ataina avaha imavi-havine dewaia tutuaina wayahia, kadu yawai isi-wahawahani, ka dewaia avaha bagibagi-tawane-yehai. Wayahina, nonova tutana mwagemwagei Iesu vaneana wayahina, tau yawai goyona, kate ataina avaha yawai goyo-vainena.✧

²¹ Aituhu aviyaivia eha dewa tunuhina a etawana it'-anamane, tau mwagemwagei imamaei. Kate aituhu aviyaivia Yaubada ya veimea ahihinata inononi tau nau-wahe aitam wayahina, e aituhu etawana ivaniahei, ka munia, aituhu veimeana ivihahaiei, ka aituhu etawana tanoi wayahina imagigino, vona ahiahina, tau avaha yawai ivi-goyo-vainei.✧

²² Kadu vona tana-minikuna tunutunuhina imamaei. Aitam ivona,

“Kedewa tauna ovanina n'-am-havinei.”

Ka kadu aitam ivona,

“Aituhu pono kanosia,
tuta eha ani-hoina na-iakwa wayahina
na-mavi-havine motopuna
wayahina.”

✧ **2:20:** Mat 12:45. ✧ **2:21:** Luk 12:47-48.

Ka tau viwavene-naia yai dewa deinake.✧

3

Kauvea Ya Mavi-havine

¹ Yaiaiu, adewa-vidovidohemi. Taina yami leta v'-inuana wayahiua, ka ainua nihenia yau nu-anua dewa ahiahina unua-vi-avini kadu dewaia wayahi unuanua.

² Ka itomi nau-wawanimi Yaubada ya tau apa-taputapu ahihinata yai mai-vona unua-vi-avini, ka kadu nau-wawanimi veimeana yaka Kauvea kadu yaka Tau Ito-yavuha venemi itoai tau hae ananiai wayahiaia unua-vi-avini.✧

³ Ka yau pai mini naona nau-wawanimi nuami n'-am-hau'i un'-anamane'i ahiahina vivane tuta a pai nau-yehata wayahina tau vi-waipō tupwai ivin'-omo wayahimia, e tau'i ai nau-dadana goyona ivi-munie'i, ka Kauvea ya etawana ivi-waipoe'i,✧

⁴ ina-vona, “Nonova tauna vona-dabadaba boui yana omana kadueyei, a? Kate yana omana aveta? Tuta nonova bana mamanaina wayahina yaka tupua-nenenehi imamaei, ka munia yawai iakwa. Ka omomo a itoava tuta ataina wayahina, ka dewa habuhabuna ineine aitamoata, dewa habuhabuna tanopi a veve-wana ana tuta wayahina ivi-putu deina. Ya vona-dabadabana vitupu!”✧

⁵ Kate tau'i yai nuanua dewa aitamoata nuai na-pani, vivane tuta nonova Yaubada tauna yana

✧ 2:22: V.T 26:11. ✧ 3:2: Iud 17. ✧ 3:3: 1Ti 4:1; Iud 18. ✧ 3:4: Mat 24:48.

vona ana heta wayahina wahuma vevewanei, kadu daudau epei, e tanopi vevewanei daudaua.✧

⁶ Ka munia, tanopi-nana gavivina daudau-naia nihenina, iakwa.✧

⁷ Kadu Yaubada tauna yana vona wayahina avaha wahuma kadu tanopi ainua ataina imamaei vi-nua-dadani ipotapota a itoava vitana matana an' auyewa na-omo wayahina. Ka auyewana wayahina, tauna wahuma kadu tanopi taina n'-anai-yehai, ka kadu tau goyogoyoi habuhabui na-vita-vovoni.

⁸ Yaiiau adewa-vidovidohehemi, ka itomi nau-wawanimi vona aitamoata tuta ana iava wayahina unua-vi-avini. Kauvea eha ta-nuanua tuta wayahina itoka tomotau kanuanua tuta wayahina deina. Tauna wayahina auyewa aitamoata vivane ponimana ai yau 1000 taukaia deina, kadue ana pata ponimana ai yau 1000 tauna wayahina vivane auyewa aitamoata itoka tomotau wayahikaia deina.✧

⁹ Wayahina, eha nau-wawanimi unuanua Kauvea tauna ya vona-dabadabana nua-panipanie, tupwai tomotau inuanua deina. Eha ohotu. Tauna potapotami, iuna ya nuanua ananina eha aitam tomotau yawai-vavaha na-tutu-haini, kate ya nuanua tomotau habuhabui inua-vinana.✧

¹⁰ Kate apaina, Kauvea ya mavi-havine an' auyewa na-omo tau vainau ya vin'-omana deina. Ka auyewana wayahina wahuma habuhabuna na-iakwa pai-edana ani-vainena wayahina, kadu dewaia habuhabui ataina wahuma imamaei, ai

✧ 3:5: Nao 1:6-9. ✧ 3:6: Nao 7:11; 2Pi 2:5. ✧ 3:8: Sam 90:4.

✧ 3:9: Aba 2:3; 1Ti 2:4.

ananata nihenina in'-anai-yehai, ka kadu tanopi taina kadu dewaia habuhabui hetana imamaei in'-anai-yehai.✧

¹¹ Ika. Apaina Yaubada dewaia habuhabui na-vita-vovoni deinake. Wayahina, itomi medeina? Avi dewa nau-wawanimi udedewei? Vona ahiahina, nau-wawanimi yawaimi ahihinata, kadu yawaimi Yaubada ya nuanua wayahimi deina.

¹² Iuna upotapota Kauvea yana omana an' auyewa wayahina, kadu yami dewa ataina auyewana ina-ivaitei visi-kwayavoni. Auyewana wayahina Yaubada wahuma na-vita-vovoni ai ananata nihenina, kadu vevewana a gugua pai vi-putu kikitu-vainena ikwanene ina-iakwa, iuna ananatana weweavi-vainena.

¹³ Kate itoka eha kanua-vita. Yaka nua-vaniaha nui kapotapota wahuma kadu tanopi vovou ka-vaniahei, nonova Yaubada ya vona-dabadabana wayahi deina. Ka papani-nana wayahina tau tunutunuhika yaka meagai.✧

¹⁴ Yaiiau, avaha anamanemi, yami nua-vaniaha nui dewaia habuhabui upotepotei. Wayahina, nau-wawanimi udewa-bagibagi, ka auyewa aitamoata aitamoata wayahina udune-vivinimi yawaimi nihenina eha aitam aviani goyona, ka eha aitam pai ini-yauyau. Kadu nau-wawanimi udewa-bagibagi, e nua gomagomanina nihenina Yaubada nui umamaei.

¹⁵ Kadu nau-wawanimi aviani wayahina yaka Kauvea potapota unuanuani. Ka vona ahiahina, yaka Kauvea potapota, iuna ya nuanua itoka yaka

✧ **3:10:** Luk 12:39; 1Te 5:2; Mat 24:29, 35. ✧ **3:13:** Isa 65:17; 66:22; SiV 21:1, 27.

ito-yavuha kavaniahei. Dewaia tanoi wayahi kadu aka niam Paulo avaha yami leta nihenia ginumi. Tauna leta-naia ginumi nua-uya Yaubada venei wayahina.✧

16 Ka avi leta habuhabui ginumi, tauna yana dewa nihenia aitamoata deina. Ka leta-naia nihenia vona tupwai imamaei, ka eha memeanina kan'-anamanei, vivane nuaka vi-tupatupa. Ka tupwai tomotau mwagemwagei, ka yai vitumahana eha toyoina. Wayahina, Paulo ya vonaia pai nua-tupatupaia tanoi iepepei, ivinovinoi, ka ai anamana ivo-vinevinei. Tomotau-naia kadu mani vona Iginuma nihenina idedewei deinake. Wayahina, ai vita-vovona na-omo, iuna tau i yai dewaia goyona tanoi.

17 Kate taumi, yai iau adewa-vidovidohe mi, avaha dewaia uanamanei. Wayahina, udune-vivinimi ahiahina. Aituhu eha udune-vivinimi, kaiwadi, tau i veimea itana-bwegebwegei yawaimi ivi-goyoi yai dewa goyona wayahina. Ataina yami vitumahana toyoina. Kate aituhu eha udune-vivinimi ahiahina, apaina tau i ieta-naoemi yami vitumahana tunuhina uni-tawanei, e ivo-vi-peumi deina.✧

18 Ka yau nuanua wayahimi yami nua-uya yaka Kauvea kadu yaka Tau Ito-yavuha Iesu wayahina na-nata, kadu yau nuanua yan' am-venena awawaehina yawaimi nihenina na-nata. Tauna nau-wawani didiga habuhabuna na-vaniahei, tuta ataina a itoava tuta eha a ito-vewana wayahina.

✧ 3:15: Rom 2:4. ✧ 3:17: Mar 13:33; 1Ko 10:12.

Ana pata deina.
Yauke Simoni Pita

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023

b67aeef-7e9d-566a-9ff5-cb22ab7e2ea4